

Vedlegg til kongelig resolusjon 13. februar 2026 Forskrift om vern av Krossfjorden marine verneområde

Forskrift om vern av Krossfjorden marine verneområde i Øygarden, Austevoll, Bjørnafjorden og Bergen kommunar, Vestland

Fastsett ved kongeleg resolusjon 13. februar 2026 med heimel i lov 19. juni 2009 nr. 100 om forvaltning av naturens mangfold (naturmangfoldloven) § 34, jf. § 39 og § 62. Fremja av Klima- og miljødepartementet.

§ 1. Føremål

Føremålet med Krossfjorden marine verneområde er å ta vare på eit spesielt og uvanleg djupt kystområde med særprega biologisk mangfald knytt til havbotnen, mellom anna korallrev, særprega kalkalgar og store areal med tareskog som aldri har vore kommersielt hausta, samt eit viktig oppvekst- og beiteområde for eit mangfald av marine artar. Det er ei målsetjing å halde verneverdiane utan større grad av ytre påverknad, og området skal kunne tene som referanseområde for forskning og overvaking, irekna referanseområde for å kunne studere effektar av tarehausting og reketråling.

Verneføremålet knyter seg til vassøyla og sjøbotnen.

§ 2. Geografisk avgrensing

Grensene for det marine verneområdet går fram av vedlagte kart datert Klima- og miljødepartementet februar 2026.

Det marine verneområdet dekker eit sjøareal på om lag 192,6 km² i Øygarden, Austevoll, Bjørnafjorden og Bergen kommunar, med grense mot land langs djupnekote 2 m under sjøkartnull for heile området, unntatt indre delar av Krossfjorden kor grensa går mot djupnekote 100 m. Ytre avgrensing følgjer 200 m under sjøkartnull ut mot Nordsjøen.

Verneområdet femner om overflata, vassøyla og sjøbotnen.

§ 3. Vernereglar

I det marine verneområdet må ingen setje i verk noko som skader verneverdiane nemnt i verneføremålet. Følgjande vernereglar gjeld:

- a) Vegetasjonen, medrekna tang, tare og andre marine planter, er verna mot skade og øydelegging. Planting av vegetasjon er forbode.
- b) Dyrelivet i sjø er verna mot skade og øydelegging. Utsetjing av organismar er forbode.
- c) Området er verna mot tiltak og inngrep som kan skade verneverdiane som t.d. etablering av ulike typar anlegg, utfylling, byggeverksemd, plassering av konstruksjonar på sjøbotnen, andre varige eller midlertidige innretningar, legging av røyrleidningar og kablar, utføring av avløpsvatn og andre konsentrerte tilførsler av ureining, mudring, uttak og deponering av masse, sprenging, boring, utslepp av kjølevatn frå land, omrøying av vassmassar og oppankring. Forsøpling er forbode.

§ 4. Generelle unntak frå vernereglane

Vernereglane i § 3 er ikkje til hinder for:

- a) gjennomføring av militær operativ verksemd og tiltak i samband med ambulanse-, politi-, brannvern-, oljevern-, rednings- og oppsynsverksemd (ikkje øvingsverksemd), samt gjennomføring av skjøtsel eller forvaltingsoppgåver som er bestemt av forvaltingsstyresmakta
- b) eksisterande bruk av skyte- og øvingsfelt
- c) oppankring mot land, fortøying av småbåt, og anlegg av fortøyingfeste medrekna fastfortøying, dragfortøying og feste for låssetjing av fisk, der fortøyingmiddel på faste fortøyingar må være i stein eller anna materiale som ikkje forureinar
- d) hausting av villlevande marine ressursar i samsvar med havressurslova og andre lover og forskrifter, med unntak for hausting av vegetasjon, medrekna tang, tare og andre marine planter og reketråling i referanseområde kartfesta i vernekartet
- e) tradisjonell låssetjing av fisk
- f) fiske i samsvar med lakse- og innlandsfiskeloven
- g) jakt og fangst i samsvar med andre lover og forskrifter
- h) ferdsel med fartøy
- i) drift og vedlikehald av eksisterande sjømerke og andre navigasjonsinstallasjonar
- j) drift og vedlikehald av eksisterande sjøkablar og naudsynte reparasjonar ved akutt utfall
- k) drift og vedlikehald av andre eksisterande anlegg og innretingar, medrekna vegar, bruer, brygger, moloar, båtstøer og båthus
- l) oppgradering og fornying av eksisterande sjøkablar for å heve spenningsnivå og auke linetverrsnitt når dette ikkje føreset vesentlege fysiske endringar som ikkje er i samsvar med verneføremålet

§ 5. Spesifiserte dispensasjonsreglar

Forvaltingsstyresmakta kan etter søknad gje dispensasjon til:

- a) oppføring av naudsynte navigasjonsinstallasjonar og andre farleistiltak for å trygge ferdsle til sjøs
- b) legging av kablar og røyrleidningar og så langt som mogleg samla i korridorar
- c) oppgradering og fornying av sjøkablar som ikkje fell inn under § 4
- d) tilretteleggingstiltak for friluftsliv
- e) småbåthamner medrekna m.a. flytebrygger og fortøyingar
- f) tekniske tiltak som inneberer små inngrep på botnen og som ikkje påverkar dei marine verneverdiane inkludert vassutskifting og straumforhold nemneverdig
- g) vedlikehaldsmudring
- h) istandsetting, skjøtsel og vedlikehald av kulturminne
- i) mindre uttak av sand til eige bruk for tilgrensande grunneigarar
- j) bølgedempingar i samband med småbåtanlegg
- k) reketråling i referanseområde (jf. vernekart) i samarbeid med forskingsinstans
- l) akvakultur som ikkje er i strid med verneføremålet
- m) levandelagring av villfanga fisk inntil 12 veker
- n) uttak av framande, introduserte artar
- o) bruk av eksisterande skyte- og øvingsfelt som ikkje fell inn under § 4 bokstav b

§ 6. Generelle dispensasjonsreglar

Forvaltingsstyresmakta kan gjere unntak frå forskrifta dersom det ikkje er i strid mot føremålet til vernevedtaket og ikkje kan påverke verneverdiane nemneverdig, eller dersom tryggleikssyn eller omsyn til vesentlege samfunnsinteresser gjer det naudsynt, i samsvar med naturmangfoldloven § 48.

§ 7. Skjøtsel

Forvaltingsstyresmakta, eller den forvaltingsstyresmakta bestemmer, kan setje i verk tiltak for å oppretthalde eller oppnå naturtilstanden som er føremålet med vernet, i samsvar med naturmangfoldlova § 47.

§ 8. Forvaltingsplan

Forvaltingsstyresmakta skal utarbeide ein forvaltingsplan med nærare retningslinjer for forvalting og skjøtsel av det marine verneområdet. Forvaltingsplanen kan innehalde nærare retningslinjer for gjennomføring av skjøtsel.

§ 9. Forvaltingsstyresmakt

Statsforvaltaren i Vestland er forvaltingsstyresmakt etter forskrifta.

§10. Rådgjevande utval

Det kan opprettast eit rådgjevande utval for forvaltinga av verneområdet.

§ 11. Iverksetjing

Denne forskrifta tek til å gjelde straks.